



FOTO G. A. CAVIEZEL

# L'amur è ferma sco la mort

Referats da cristians, gidieus e musulmans a Turitg

DA GUIU SOBIELA-CAANITZ

■ **Er umans pauc religius sa regordan ch'i dat ina realitad surnatirala cur ch'i s'entaupan cun il misteri da la vita, saja quai tar ina naschientscha, la pubertad, la fundaziun d'ina famiglia u in mortori.**

Per il chau religius d'ina prava da dat quai savens l'occurasiun d'em-prender a conuscher famiglias che stat-tan daditg en ses intschess. Tuttas religi-uns principalas mettan grond pais sin la lètg e la collian cun differents usits da nozzas. En Grischun vala quai per las duas baselgias tradiziunalas. Lezzas vi-van en l'entira Svizra; en chantuns ur-bans datti plinavant pitschens ravugls giudaics, insaquants cun in rabin, e cu-minanzas islamicas pli grondas, naschi-das en ils davos decennis pervi d'in'im-migraziun cunzunt albanaisa, bosniaca e circa. A Turitg sa sviluppa dacurt ina

cooperaziun tranter las duas baselgias principalas, duas cuminanze islamicas e duas giudaicas. Amez avust organise-schan ellas ensem trais occurrenzas davart usits da nozzas tar musulmans, cristians e gidieus ed in inscunter ecu-menic da conclusiun.

## Sut l'ensaina d'Abraham

Las quatter sentupadas stattan sut il ti-tel «Sin via cun Abraham». Lez è il bab da tuttas trais religiuns; l'islam al vene-rescha sco represchentant dal monoteis-sem en cunter l'idolatria da ses bab e ses cumpatriots. La seria d'occurrènzas è introducida cun in citat ord il «Cantic dals cantics» («Schir ha schirim»), in dals cudeschs ils pli bels ed ils pli curts dal Vegl Testament: «Ma tschenta sco in bul sin tes cor, sco in bul sin tes bratsch! Perquai che l'amur è ferma sco la mort, la schigliusia è inflexibla sco il reginam

dals morts» (8, 6). L'emprima occurren-za ha lieu glindesdi, ils 16, a las 20.00, tar ils musulmans tircs, Birmensdorfer-straße 273 (fermada da tram Gold-brunnenplatz). La segunda saira, mardi, ils 17, er a las 20.00 organisescha la pra-venta catolica «Liebfrauenkirche», Weinbergstraße 36 (fermada da tram Haldenegg). La terza e davosa saira, mesemna, ils 18, puspè a las 20.00 ha lieu a la sinagoga da la Löwenstraße, entrada Nüscherstraße 36. L'occur-renza ecumenica da conclusiun, entitu-lada «L'uraziun da las religiuns», ha lieu dumengia, ils 22, a las 11.00 en la «Pre-digerkirche», Zähringerplatz (fermada da tram Central). Ins po be solidar ina tala cooperaziun tranter duas baselgias renconuschidas uffizialmain e duas cu-minanzas pli pitschnas e marginalas, ma che stattan sut l'ensaina dal medem patriarc mitic.